

SESSIONI URDINARIA DI U 2020

RIUNIONI DI U 6 DI FRIVAGHJU DI U 2020

N° 2020/M2/17

QUISTIONI URALI DIPUSITATA DA JEAN-PHILIPPE CASALTA, A L'ATTINZIONI DI U PRESIDENTI DI U CUNSIGLIU ESECUTIVU DI CORSICA

Ughjettu : Amministrazioni trasparenti : Da a teuria à a pratica

Cari amichi consiglieri, cari eletti di a Cullettività di Corsica.

Vi dicjarà qualcosa issa nuzioni di trasparenza, o in fatti, di Casa di Cristallu ?

Hè a parolla data da i naziunalisti in lu 2015. Hè l'azzioni applicata in Italia da qualchi anni (decretu 33 di u 14 di marzu di u 2013) incù a nuzioni d'« Amministrazione Trasparente ».

Iss'applicazioni concerna l'indicazioni di leggi, documenti, infurmazioni è dati d'organizzazioni di l'amministrazioni, l'attività è i so mudalità di realizzazioni. Di manera evidenti, tuttu hè cundiziunatu à a prutezzioni di i dati privati à u sensu di u rigulamentu aurupeu di i dati parsunali (RGPD) incù a numinazioni di referenti in issu scopu.

Asempiu semplici : Vuleti sapenni di più annantu à a perfurmanza amministrativa di a voscia cumuna o righjoni ?

Basta à andà annantu à u situ internet di l'istituzioni, circà annantu à « Amministrazione Trasparente » è piddà ciò chì vuleti : Tassi di prisenza di l'agenti serviziu par serviziu, agenzia par agenzia, incarichi amministrativi di i parsunaghji

importanti di a cullettività (CV + dichjarazioni di patrimoni « stilu HATVP »),
numaru mensili di parsunali (titulari è micca), misura di i perfurmanzi di
l'amministrazioni, budget serviziu par serviziu ecc.

A sapeti vo u tassu d'assenza di i parsunali pà l'ultimu trimestru di u 2019 à a
Cullettività di Corsica ?

U sistemu Talianu vi parmetti di sapè quissa : in una righjoni (Veneto, Umbria) o
una cumuna (Arzachena, Trieste), si pò seguità par mesi o par trimestru issi dati. Si
vedi cusì l'efficienza di a so amministrazioni.

Cusì, un rapportu di perfurmanza annuali hè pruduttu da i servizii è publicatu in
linea. U rapportu cuncerna u numaru di deliberazioni è i so ughjetti, l'impieghi
missi in baddu è a raghjoni d'iss'ultimi impieghi, l'analisi settori par settori di
l'ubiettivi privisti à l'iniziu di l'annu è u so puntu d'avanzata, a valutazioni di i
risponsevuli di l'amministrazioni è u so sapè fà. In somma, un documentu di una
cinquantina di pagini pienu di bon sensu chì faci prova di pedagogia.

Un publicu espertu pudaria cuntentassi di i documenti isciuti in trè tomi
« Usservazioni-Seguitatu di l'Azzioni-Pruspettiva » (sintesi ed integrali) publicati di
manera annuali ind'u stilu di a Corti di i conti mà simplificà i cosi pà u citadinu
urdinariu è rendali accessibili à tuttu ognunu hè un gestu utili.

In Corsica ? Circheti « administration », aveti simpliciamenti un urganigrammu
assai cumpletu. Micca dittaglii in più.

Ùn hè micca parchì a Francia hè in ritardu ch'ùn avemi micca issu duveri murali è
suciali d'innuvà !

Parchì a Corsica devi essa issa terra di spirienzi novi, in punta à a lotta contr'à i
« fake news » o « falsi nutizii » di u stilu « Ùn facini nudda è sò sempri assenti ».

Parchì ùn hè micca vera è tengu à renda umaghju à i parsunali chì rendini un
serviziu d'altissima qualità, ogni ghjornu.

Pinseti chì pudariati metta in baddu una pagina specifica pà a publicazioni di dati
generichi di a Cullettività di Corsica rispittendu à u RGPD cum'è i tassi di prisenza
di i parsunali par serviziu/agenzia è soprattutto un rapportu annuali di perfurmanzi
di l'amministrazioni tarritoriali ?

Un pocu di trasparenza à u mudellu Talianu ci daria iss'immaghjini di prubità, di
modernità chì a nova Cullettività di Corsica si devi d'avè è di sparta à l'altri, à a
manera d'un mudellu.

Un mudellu chì ci surtaria di a sfiducia permanenti è podassi di l'astensioni
sistematica, cunsequenzi di iss'insicurità di risultatu vista da l'ochji di un citadinu

« lambda ».

Hè u nosciu duveri di dà l'asempiu è di muscià u caminu di a virtù à l'altri.
Je vous remercie.